

爲後人戒

上清大洞法師左力行書

道法會元卷之二百六十八

上清靈寶大法序

古序

舊一

昔我祖師元始天尊大慈愍廣濟羣生歷劫度人先天立教隨方應物不拘於三境九泉布化流形豈限於人間象外自龍漢淳古之世教之以大乘遠延康朴散之時授之以中法大乘則無爲無事任物自然中法則有急有勤因機善誘洎開皇以後赤明乃還俗變澆漓人隳真素忘緣棄本溺性迷情背妙有之玄功失自然之奧旨由是方諸闕下多虛青簡之名鄴都臺中益感黑書之目淪謝者崇朝接轂升騰者千載比有大軫聖慈遠茲開度所以三元品誠四極明科三洞四輔之經隱地藏天之籙女青玄都之律八瓊九鼎之文金真八極之書鳳炁龍章之篆素金水玉之法開明震靈之符五老策精之文八海登真之篆大劫洪真之札靈寶召龍之篇正一救世之章洞神開山之印上清八景之訣玄真曲素之辭太平左右之圖洞玄智慧之品乘躡躡虛之術攀魁據斗之罡或檢制

身心或獨消罪垢或吞芒餌景或鍊氣胎元或封山召雲或坐忘遺照開萬途而級引垂衆法以提携欲令抱識懷生皆登道岸豈止簪星佩月獨詣仙庭乃出三五章儀河圖黠法拜表上章之訣罡風驛騎之司凡居世間有所勝奏即日月主者里域真官乘彼驛龍聞于天闕雖上天莫遠下土卑凡感而遂通靡踰瞬息矣斯則大道救物巨細無遺請福祈真齋法爲大齋有二十七等備在三洞經中則三洞各九品齋也內黃籙齋者遐福羣有廣救三塗報應之期影隨響答古今所驗實繁其人然以精專爲先龍錄爲上香煙處深抑又次之苟有一缺亦齋之瑕玷也修奉之士得不慎哉且黃籙之法極度既多君臣通修人天普福隨其所爲理趣多門又經云三洞布化通滿人間行道修齋因宜立教人間天上久矣流行若帝王國主人民土地一切衆生有諸災厄應當消却召諸道士及以女官或多或寡廣立瑤壇懸諸幡蓋散花燒香然燈照夜行道禮

懺晝夜六時勤勤不息克復靈應福德善緣
 經曰黃籙者開度億曾萬祖先亡後化處在
 三塗沉淪萬劫超凌地獄離苦升天救拔幽
 魂最為第一此經隨世所求即可修設或三
 日或七日一時九時奏簡馳誠上天無不御
 達且靈寶者是大道之根宗元始之妙化虛
 無挺秀劫化自然陽配陰陽區分造化保安
 帝柞鎮護天民握運璇璣恢弘妙旨總五帝
 大魔之法召萬天合元之司濟度存亡統隸
 三界按梵炁而為符篆教與義而作隱章秘
 在羣珠之宮禁於華堂神府諸天至重萬劫
 一傳遵奉明科俯仰有格非宿生之大慶豈
 造次以能聞得過進修實為際會可以召靈
 炁於三關靈寶華於九戶功滿德就位列仙
 翁起死迴骸歸真返本人天欽仰變用無方
 招真召靈洞該三道所謂巍巍大梵萬法度
 人之上品者也謹序

玄序

元始祖劫為天地之根宗靈寶開闢總陰陽
 之樞紐推日月變通之理統星罡躔度之機

妙集璇網提携子午還五行之造化追三炁
 之魁進退乾坤飛旋離坎擒龍伏虎控鳳
 乘鸞朝飡紫府之英暮食青華之液煉形流
 火灌質東池六龍飛蹈於層霄九炁攬烹於
 玉鼎道之生我物無定為棄物流形則氣神
 交而真自微釋情養浩則精血通而氣自凝
 真火高奔飛扶丘之皎日水金拘制旺玉闕
 之蟾蜍八鸞同鳴讚必歌之雅韻九風齊唱
 揚十絕之玄音俯仰靈阿十方之天真自集
 朝奉太上萬靈之羽衛飛軒黍米高懸變通
 莫測包含虛昧則無執數眾咸歸濁競奔趨
 則萬炁千真盡散集炁為寶聚神為靈乾健
 純陽坤柔陰質自然之炁無形無名上極九
 清以炁假名為號下徹九地以形別號為名
 是知杳杳冥冥恍惚惚惚寂然不動感而遂
 通二炁回旋隨天地應時而動三田通妙感
 陰陽運轉而為靡在他施何勞自逸存神叩
 齒警初真入道之門鍊氣書符明學士守規
 之式欲餌吞於九轉當造物於四時回運周
 天文媾水火烹金鑄鼎鍊石補玄盜日月之

英華結神真之鉛汞先明子午次辨水金進
 退抽添知時適候溫調養育烹鍊無差勿殺
 善以欲貪勿嫉妬以浮盜遠憎去相異骨成
 親濟度天人闡教凡世通玄究微悉章洞慧
 束魔卻惱斷六根障塞之源捨妄從真滅五
 苦輪迴之戶拘魂制魄養炁藏神身有光明
 形無影響開明三景離合自然高晏鬱羅萬
 劫蕭臺登冠飛升金闕玉山絕境逍遙飛駕
 瓊輪十炁飛天自現控乘綠輦諸天五老傾
 光疾除罪簿之因落滅惡根之道妙乎茲法
 故品諸經提悟迷荒救携未悟吾昔遇清微
 丈人授以二氣吐納次遇於玄皇玉帝賜以
 金丹訣言明天地權輿之數了陰陽生殺之
 機眾丹百花盡守根而固蒂奇禽異獸咸抱
 一以合元故知顛倒五行翻覆四象盜元一
 飛玄之炁守真精妙體之英建寶鼎於崆峒
 飛金晶於靈洞媾內外之水火合上下之刀
 圭元炁周流感元黃而玄珠光耀包藏宇宙
 含金丹而寶用無窮是知天地之獨尊變化
 之無形無質乾坤之妙道生死之無始無終

道勿遠求不出戶牖親之者鮮遠之者多棄
本妄真甘樂忘於泉壤入邪於正徒度夏以
經冬靜以生強安而思極七情鼓扇陽絕陰
化而性命危六慾觸耽精散形離而神氣泯
五臟搖蕩九竅開靡知性命之端奇偶相
配何明造化宜辨玄機吾啓大慈願提仙子
將茲神氣集號玄章故名靈寶之筌蹄以應
真經之內法付于妙行出世度人化現十方
名號非一編諸經典遍滿恒沙句句為玄頭
頭是道悟茲妙理則出生入死而與道俱存
了此真機則離合自然而去來無碍遇之者
夙生仙骨行之者累世慶緣誤謫人天慮差
覺路指明圍定證悟法門行道秘藏了真可
度謹序

上清靈寶大法卷之一

詞後高士開光教苦其人審金其授

上清三洞弟子靈寶領教嗣師王善其業

開宗明義門

總叙

師曰靈寶大法者貫通三洞總備萬法是
无上大羅天元始天尊所說玉晨道君五
老上帝高真上聖妙行真人十方神王至
真大神所授後聖玄元金闕李真天帝降
世行教化度凡間得而聞之乃三十六部
尊經總計萬八千篇衆道之宗玄淵隱奧
與萬法一貫且天真皇人有八明五譯七
經八緯十奧四十七章總成一部究其微
妙皆曲盡其理夫八明者以法天開八聰
以明其幽五譯者法五劫開化生五行是
氣方成世書七經者汲引大道之徑路八
緯者範圍教法之闡域十奧者是謂十玄
四十七章訓說始末紀綱總成一部盡闡
玄奧之旨其於詳微分品立門樞貫為一

八明

一

六

一則明元始祖炁從何先化玉宇按靈寶王
字內音經云自三炁之先溟滓之後其中
真精欬化後生元炁元炁之內有神曰元
始天王其炁混凝與元始同生流化結芬
非色非相或舒或張至延康開劫一炁分

形而為二炁虛无自然而生始炁二炁交
結凝相太空彌覆無極字方一丈八角垂
芒莫知其理一炁混凝包藏玉宇至龍漢
開劫元始天王分隸二炁混沌開光炁清
高澄成天炁降積滯成地二炁分合中有
和炁名曰玄炁亦曰大炁之炁至赤明劫
元始開闢中有真陽之炁化為洞陽之火
元始運洞陽之火冶鍊三炁混和玉宇而
成赤文因而劫號赤明文號赤書玉字是
茲理矣

二則明生育混沌陶治萬範自混沌開拆三
炁成文火鍊為赤書光明之炁陽光之精
成日靈光之精成月餘光布散分為三象
三炁之神分為三清之聖自此之後萬範
皆出莫非元始三炁也

七